

Sent: Grotta da cultura

Art sün lain

(anr/mfo) Scolaras e scolars dal s-chalin ot da la scoula da Sent han transfuormà laina squadrada in ouvras d'art. L'exposiziun illa Grotta da cultura a Sent muossa cha cun culuors, fantasia e blera buna vöglija as po "dar vita perfin ad ün toc lain glimà".

Per disegnar e fuormar vegnan missas a disposiziun illas scoulas publicas be duos lecziuns l'eivna. Da realisar d'ürant quel cuort temp ün proget plü grond nun es simpel. Chi nu resta oter co dad elavurer il proget d'ürant plüss mais o da far dis o eivnas da lavur intensiva. Las 23 scolaras e scolars dal s-chalin ot da Sent han tschernü la prüma varianta per far lur "Art sün lain". Suot la bachetta da la magistra da diseg, Tina Puorger da Sent, han els elavurà d'ürant tuot l'inviern passà laina squadrada. "Quist proget ha gnü il sen da rajiundscher differents böts", ha declerà la magistra. Uschè sajan ils scolars gnüts confruntats cun stuvair far lavur da perseveranza, hajan stuvü experimentar cun differents cumposiziuns da culuors e cun fuormas geometricas. „Ultra da quai han ils scolars stuvü planisar s'vess l'exposiziun cun tuot quai chi tocca pro al arrandschamaint“, ha dit Tina Puorger. Ch'els hajan stuvü far il concept per l'exposiziun, far placats per annunzchar l'occurrentza ed elavurar e far il program per la vernissascha. Cha'ls scolars han rajiunt il böt – anzi – chi han fat propa buna lavur as vezza actualmaing illa Grotta da cultura. "Id es üna bell'exposiziun", ha dit eir Gian Albertini da Sent, il president da la Società Grotta da cultura Sent.